



Van bain d'accord ed omadus han retschet in premi: Ignaz Arpagaus (a san.) ed Andrin Beeli.



Remo Cavegn-Wasescha (a san.), il president da la Federaziun grischuna per sport, cun il hockeayer internaziunal Nino Niederreiter.



Umens bunamain sco stgaffas èn ils anteriurs lutgaders: Reto Attenhofer, Edi Philipp e Stefan Fausch (da san.).



Trais mattas che han gudagnà a Sotschi bronz tar il турниr da hockey: Livia Altmann, Evelina Raselli e Nina Waidacher (da san.).



Accompagnada è vegnida Binia Feltscher-Beeli da ses um Reto.



Cun plaschair han quellas sportistas e quels sportists sco er trais trenaders retschet ils premis a chaschun da la notg da sport 2014 a Cuira. FOTOS G. N. STGIER

«Noss chantun ha in terren productiv»

Cuira: Notg da sport

DA GION NUTEGN STGIER / ANR

■ **Cun Sandro Viletta, Andrin Beeli, Binia Feltscher-Beeli èn dus sportists ed ina sportista da l'intschess rumantsch vegnids undrats per lur prestaziuns excellentas. Ultra da quai è Ignaz Arpagaus il trenader grischun da quest onn.** Dapi 15 onns undrescha la Federaziun grischuna per sport sportistas e sportists da noss chantun ed a medem temp vegn er elegi il sportist grischun da l'onn u la sportista grischuna da l'onn. Betg uschè veglia è la notg da sport, l'occurrentza nua che la prominenz da l'economia, da la politica e natiralmain da sport s'entaupa per assister a la surdada dals premis. Venderdi passà ha gi lieu a Cuira la terza notg da sport è cun esser da la partida davairas blera prominenz tutga quella tar l'occurrentza cun il motto: vesair ed esser vesai.

Set milliuns francs dal maun public

President da la Federaziun grischuna per sport è Remo Cavegn-Wasescha da Panaduz. En ses pled da bainvegni ha el ditg che la notg da sport saja la vitrina actuala dal sport. Losch è dentant Remo Cavegn-Wasescha er che tar ils gieus olimpics a Sotschi il favrer passà sajan tuttina stads preschents 30 sportists e sportistas da noss chantun. Cusseglia guvernativ e minister da sport Martin Jäger è cunzunt sa mussà fitg ventiraivel da lur prestaziuns en Russia. «Nus essan en ina situaziun sco paucs auters cun avair ina uschè gronda schelta

sch'i va per eleger il sportist ubain la sportista da l'onn», ha menziunà Martin Jäger. El ha er ditg che en il Grischun hajan lieu en in onn radund 2300 occurrenz da sport e davart dal maun public vegnian tuttina set milliuns francs per il sport. Noss chantun saja sco ch'i para in terren productiv per avair success en il sport.

Nagina surpraisa

Sin proposta da las diversas federaziuns da sport aveva l'uniun tetgala nominà quatter sportists e quatter sportistas che vegnevan en dumonda per il titel da sportist grischun 2014. Per la tscherma da quel quintan 50% da las vuschs entras il voting electronic dal public ed ils auters 50% entras ina giuria. Nominads eran tar ils umens: Sandro Viletta, kkiunz, Nevin Galmarini, snowboardist, Edi Philipp, lutgader e Gino Deflorian, nudader. E quai eran las dunnas nominadas: Binia Feltscher-Beeli, curlinghista, Evelina Raselli, hockeayera, Silvia Casutt, chavaliere e Laurien van der Graaff, curridra da passlung. La tensiun era bain gronda durant l'entira saira tar la notg da sport e tuttina era Sandro Viletta, il victur olimpic tar la cumbinaziun, per blers il grond favorit per daventar sportist grischun da quest onn. Il premi è dal reminent dotà cun 10 000 francs. Il skiunz simpatic da La Punt ha lura er gi l'onur da retschaiver quel premi. Cun daventar Sandro Viletta sportist grischun da l'onn 2014 è quai per el in ulteriur success en sia carriera, suenter il pi grond, la medaglia dad aur

tar l'olimpiada a Sotschi. L'ultim skiunz alpin ch'è stà il meglar sportist grischun da l'onn è stà il 2009 Carlo Janka. La laudatio per Sandro Viletta ha tegnì Gian Gilli e cun luschezza ha el ditg: victur olimpic resta in per sia vita duranta.

Onur per ina Sursilvana e dus Sursilvans

Scrit bunamain istorgia ha quest enviern er il team da curling da dunnas Flem cun gudagnar aur tar il campinadi mundial en Canada. Skip da quella equipa è Binia Feltscher-Beeli ed ella ha contribuì ferm al success per il team svizzer. Dapi venderdi passà dastga Binia Feltscher-Beeli sa numnar vicesportista grischuna 2014. Il terz premi ha lura retschet Evelina Raselli da Poschiavo, la matta che ha gudagnà cun la naziunala svizra da hockey la medaglia da bronz tar ils gieus olimpics a Sotschi. Sportist grischun da quest onn è tar ils giuvens il biker da muntogna Andrin Beeli da Sagogn. Cun ses 19 onns è il campin svizzer dals juniors sin la meglra via da daventar in segund Nino Schurter. In um che ha gronds merets per il success d'Andrin Beeli è Ignaz Arpagaus da Sagogn, il trenader dal Club da velos Surselva. El viva gia dapi onns per il sport da bike da muntogna e tar la notg da sport è il Sursilvan vegnì tschern sco trenader da l'onn. Il team da quest onn è il Club da skis Beverin ed il sportist da l'onn tar ils impedids è la skiunza da Tavau Bigna Schmidt. Quel premi è vegnì surdà per l'emprima giada.



Il freeskunz Elias Ambühl flancà da sia amia Sarah Pedrett (san.) ed Isabella Wieland, la moderatura da la notg da sport.